

## RETAKARI PABLO ROJANKINATZINIRI TIMOTEO

### *Wethataantsi*

<sup>1</sup> Naakatakira Pablo jankinatzi-mirori iroka. Rotyaantaa-rewote Jesús Jeepatzii-totaa-rewo naaka, tema rootaki ikantakaan-tziri owawijaa-koteeri Tajorentsi eejatzi Jesús Jeepatzii-totaa-rewo oyaako-tani. <sup>2</sup> Eeroka nojankinatzini Timoteo, nokimita-kaanteemi eerokami notyomi akemijanta-neera. Okantashitzimaetya ineshironkateemi Ashiteeri Tajorentsi eejatzi Awinkatharite Jeepatzii-totaa-rewo Jesús, okantashitzimaetya retakotemi, piñeero pijeekei kameetha.

### *Ikinakaa-shiteetari riyotaan-teetzi*

<sup>3</sup> Paerani niyaatan-takari Macedonia-ki, noshintsita-nakimi pijeekei Efeso-ki, ari okantyaa piyotaan-tyaariri jeekayita-tsiri pinampiki, ipakahaero ikinakaa-shiyitakawo riyotaantzi. <sup>4</sup> Ikenkithata-shiyitawo kenkitharentsi, ikenkithata-kota-shiyitawo jempe iiyita iwaejatziteni. Tee ooñaawon-tziro irokapaeni okaatzi rantakiri Tajorentsi okantyaa akemijantan-teeyaariri, tema rootaki kantakaan-tzirori iñaana-minthata-wakaantari atziri-paeni. <sup>5</sup> Aryaajeeni aaka aririka ayotaante, akamantantziro jempe ikanteeta retakota-wakaeta. Tema aririka akite-shiretanee, aririka akenkishiryaa-neero tampatzikata-tsiri, aririka akemijanta-perotanee, rootaki amatantawori

etakoyitanta. <sup>6</sup> Ari itzimpina-yitaki irika-paeni, aminaashi-waetaka okaatzi ikenkithata-koyitziri.

<sup>7</sup> Ikowashi-waetaka riyotaantero Ikantakaanteetani. Okantawitaka ishintsi-tantzi riyotaantayitzi, roo kanteencha teera ikemathatzitawo rirori okaatzi riyootanta-witari.

<sup>8</sup> Rooma aakapaeni ayotzi omaperota okameethataki Ikantakaan-teetani, roo kanteencha otzimathee akemathatero oeta otzimantari Ikantakaateetani. <sup>9</sup> Tema kaari rojankinee-tziniri ikaatzi kameetha-shireeteentsiri, tema rootaki rowajankitee-tantyaariri koshekinkari-paeni, piyathari-paeni, kaari-pero-shireri-paeni, tsimae-nkatzinkari-paeni, theenkan-taniri-paeni, maninta-shiretan-taniri-paeni, owamaayitziriri ashitariri, owaan-tzinkari-paeni, <sup>10</sup> mayempiiri-paeni, pankinatawakaa-chari ishiramparin-kaki, noshikan-taniri-paeni, theeri-paeni, kamatawiri-paeni, ikaatzi otzika-tzika-yitzirori ayotaantzirowa kameethari. <sup>11</sup> Tema inashita iroka Kameethari Ñaantsi roweshiryaa-wentee-takari, rootaki ikantakinari Ashiteeri Tajorentsita-tsiri nokamantanteero.

### *Rantawaeri Pablo*

<sup>12</sup> Riitakira Awinkatharite Jesús Jeepatzii-totaa-rewo shintsita-kaakinari. Rootaki nopasoonkitantariri, tema riyotzi aawyaashire-waetaana, rotyaantakina nantawaeteniri. <sup>13</sup> Okantawitaka paerani osheki notheen-kashi-waetakari, nokijaneentakiri, nowajankitaa-piintakiri rashiyitaari, roo kanteencha retakotaana rirori. Tema tee niyowitawo okaatzi

nantakiri tekira nokemijanta-nakiita. <sup>14</sup> Roo kanteencha irika Awinkatharite antawo retako-perotakina, ari netanakari nokemijanta-neeri Jesús Jeepatzii-totaa-rewo, osheki netakotanaari, riitaki kantakaa-kinawori. <sup>15</sup> Iroka nokaman-temiri kyaariperori iroka, otzimatyeetikemijanteetero:

Ipokaki Jesús Jeepatzii-totaa-rewo jaka kepatsiki rowawijaa-koyiteeri kaari-pero-shireripaeni.

Tema naaka awijayi-witakariri maawoeni nokaaripero-shire-witaka. <sup>16</sup> Rootaki opoñaantari ineshironkateena Jesús Jeepatzii-totaa-rewo, tee ronaneentana okantawitaka naaka maperowitakawori nokaariperotzi. Tema ikimitakinaha naaka, ari ikantayitee-yaari itsipa ikaate kemijanta-yiteerini, ashi rowaero rañaayitee. <sup>17</sup> Okantashitzimaetya ashi rowaero ipinkathaperoe-teeri Apaanita-tsiri Tajorentsi, Yotaniri, Kañaaniri, Tajorentsi. Kyaariwé.

<sup>18</sup> Notyomi, Timoteo, tzimatsi nokoyiri nokamantemi. Okimityaawo okaatzi ikenkithatakoeta-kimiri paerani. Rootaki nokamantantzimirori pithaamenta-shiretan-tyaari piyaata-kaero piñaashintsi-perotyaa kameetha, <sup>19</sup> eekiro poetziñaariko-tanaki-tyeeyaaawo pikemijantanaki, eekiro poshireta-nakityee-yaawo tampatzikatasiri. Tema eeniyitatsi pakaa-kirori. Okantawita ikemijanta-yiwita, okimiwitaka ipitamenkakota-kityeemi. <sup>20</sup> Ari ikantakari Himeneo ejatzi Alejandro. Riitaki noshinetakiri rowashironkaa-yiteeri Kamaari, ari okantyaa Riyotan-tyaari eero

itheenka-tajorentsi-waetziri Tajorentsi.\*

## 2

### *Ikenkithatakoetziro amanaatsi*

<sup>1</sup> Iroka netawakyaari noshintsi-temiri: Otzimatye pamanya, pikowako-wentante, pikanta-kowentante, pamanako-tyaari maawoeni. <sup>2</sup> Pamana-kotyaari pinkathari-paeni. Pamana-kotyaari eejatzi jewari-paeni, ari okantyaa pijeka-yitan-tyaari kameetha, pipinkatha-jorentsitante, pitampatzika-shirete eejatzi. <sup>3</sup> Rootaki kameethata-tsiri maawoeni iroka. Rootaki inimotziriri Tajorentsi owawijaako-shireteeri. <sup>4</sup> Tema ikowitzii Tajorentsi maawoeni rawijako-shireeteete, ikoyi eejatzi maawoeni riyotakoe-teero kyaariperori ñaantsi. <sup>5</sup> Iroka kyaariperori ñaantsi: Apaani ikanta Tajorentsi. Apaani ikanta kantako-wentziriri atziri-paeni janta Tajorentsi. Riitakira irika Jeepatzii-totaa-rewo Jesús atziriwiteen-chari rirori. <sup>6</sup> Riitaki pinakowenta-kaeri maawoeni ikamawenteera, rookakaako-wenta-yitee ikowakaapa-kyaaworika Tajorentsi. <sup>7</sup> Rootaki riyoshiitan-takinari naaka Notyaantaa-rewote, riitaki otyaanta-kinari nokenkithata-kaayiteeri atziri kaari asheninkayita, niyotaa-yiteeri ikemijanta-yiteero kyaariperori ñaantsi. Tema omaperotatya roori.

<sup>8</sup> Jempe-rika ipiyoteeta-piintyaa, nokoyi ramana-piinta-yiteeya atziri, itzinaa-wakoyityaa ikimita-piintaha. Roo kanteencha

---

\* **1:20** Kamaari = Yakatantaniri

ikiteshireyite, eero ikija-wakaa-waeta, eero iñaana-minthata-wakaa-waeta. <sup>9</sup> Ari okimitaneeyaari tsinani-paeni, eero oñaawena-waeta okithaatyaawo owaneenkata-chari, apaawaateri koriki amananta-yiteri othatani poreryaa-yitatsiri, oñaawena-waetyaawo owaneenkatero oeshi.\* <sup>10</sup> Tema otzimatyee iroka-paeni ameteeyaaawo okaatzi kameethata-tsiri. Ari okantari tsinani-paeni etakotariri Tajorentsi, pinkathatziriri eejatzi. <sup>11</sup> Aririka riyotaanteete, owayempitayityaa tsinani okemijante. <sup>12</sup> Tee noshineta-kaantziro iyotaante tsinani, tee noshineta-kaantziro eewateri shiramparipaeni eejatzi. Apatziro owayempi-tayityaa okemijante. <sup>13</sup> Tema riitaki Adán reteetaka paerani rowetsikae-takiri, rootaki impoetapaentsiri Eva. <sup>14</sup> Kaari Adán ramatawiteetaki paerani, tema rootaki tsinani ramatawi-teetakiri roojatzi antanta-kawori kaari-perori. <sup>15</sup> Roo kanteencha iroka tsinani-paeni tzimayita-tsiri eentsite, aritaki okantaki awijako-shire-yitee eekiro-rika iyaatacaa-nakityeero okemijantayitee, etakotantayiteeyaa, okite-shire-yitee, eero okaashintyaki-yitziro oethaari ikowan-teetyaawori.

### 3

#### *Jempe ikantayityaa jewari-paeni*

<sup>1</sup> Kyaaryoowa nokantemiri: Tzimatsirika kowatsini reewateri kemijantzinkari-paeni, ari okameethatzi okaatzi ikoyiri

---

\* **2:9** poreryaa-yitatsiri = ororo, perla

ranteri. <sup>2</sup> Ikaatzi jewayita-tsiri otzimatyeetikameetha-shirete, eero itzimayitzi iita kenkithata-kowaeterini, ikinayityaawo iina, ikiyothanite, ranta-piintero kameethari, ipinkathata-kaantyaa, roemaantayite ipankoki, riyotaantayitee. <sup>3</sup> Eero ishinkita-piinta, eero ikija-piinta, retakotantayityaa, itsinampa-shireyitee, eero ikowashiwaeta roshekitero rashaahawo. <sup>4</sup> Riyote reewayiteeri ikaatzi jeekapankotziriri, pinkathari ikantante itomi-paeni, eero ipiyatha-waeta. <sup>5</sup> Tema apaani atziri kaari yoteroni reewata-kaante ipankoki, *¿kantachama* reewawenteri ikaatzi kemijanta-neeriri Tajorentsi? <sup>6</sup> Ari ikantari eejatzsi owakirata-tsiri ikemijantzsi, eero omata reewata-kaante. Tema aririka imatero reewate, ari ikantakaa-perowaeta-nakyaa, ari roshiya-kota-kyaa okaatzi awiji-mota-kiriri paerani Kamaari. <sup>7</sup> Aririka piyoshiite jewatziriri kemijantzinkari, pamine ipinkathatziri atziri-paeni kaari kemijanta-tsini. Riirika powaki ikantako-waetee-tziri, riitakira kaari amaweteroni ramatawiteri Kamaari.

*Jempe ikantayityaa amitakotziriri jewari-paeni*

<sup>8</sup> Ikaatzi amitakotziriri jewatziriri kemijantzinkari-paeni, otzimatyeetipinkathata-kaantyaa, ameentaa-rewo rinatyee, eero ishinkita-piintayita, eero ikowashiwaeta ishenitero rashaahawo. <sup>9</sup> Okowa-perotatyaa riyotako-yiteero okaatzi akemijanteeri kaari riyotakowiteeta paerani, ikenkishiryakopiinteero tampatzikata-tsiri. <sup>10</sup> Omantantyaari ramitakoteri jewari-paeni, otzimatyeet iñaantee-tawakaari

aririka imatakiro. <sup>11</sup> Ari okimiyityaari eejatzi tsinani otzimatye opinkathata-kaantyaa, eero okenkithatakotantashi-waeta, okempoyaa-waeni okantyaa, okyaaryoo-wenta-yitaneero maawoeni. <sup>12</sup> Ikaate amitakoteerini jewari-paeni ikinayityaawo iina, reewateeri kameetha itomi-paeni eejatzi jeeka-wankotziriri. <sup>13</sup> Aririka imataneero, ipinkathaperoeteeri, ari riyotaneero rawentaa-shiretyaa ikamantanteero jempe okanta ikemijantan-taariri Jeepatzii-totaa-rewo Jesús.

### *Omaperotatyaa okameethataki akemijantziri*

<sup>14</sup> Nokowaki niyaatemi intsipaeteeni noñeemi. Roo kanteencha netawakyaawo nojankinatemiro iroka, <sup>15</sup> aamaa-shityaa eerorika niyaatzita, nokaman-tzitemiro jempe ikanteeta ijekaetzi rashiyiteera Tajorentsi. Tema akaatzi rashiyitee Kañaaniri Tajorentsi, oshiyanaawo okanta tzinkamintsi-perori, aakapaeni otzinkamitanaa ikenkithee-tziro kyaariperori ñaantsi. <sup>16</sup> Omaperotatyaa okyaaryootzi okaatzi akemijanteeri, teera riyotako-witeetawo paerani jempe ikanteeta ipinkatha-tajorentsieetzi. Iroka akemijantziri:

Ratziritzi-motantaki Tajorentsi,  
Riitaki oñaahan-takirori Ishire tajorentsi rooperori iroka.

Riitaki Ronampiripaeni Tajorentsi ñaayita-kiriri,  
Riitaki ikenkithata-koetakiri itsipa-jatziki atziri.  
Riitaki ikemijantee-tziri maawoeni kepatsiki,  
Riitaki oenokaa-chari rowaneenkawoki.

## 4

*Ikenkithata-kotee-tziri  
ikemijantawita*                            *pakahaeroni*

<sup>1</sup> Roo kanteencha iroka okanteeri Ishire Tajorentsi. Paata, ari iñahaetaki pakahaeroni ikemijanta-witari, rootaki ikowanaki ikemijanta-yitero iñaani kamaari-paeni, ramatawitan-tzira. <sup>2</sup> Riyotaa-waeta-shitan-tyaawo kamatawiri kaari rooperota-tsiri, eero ikemaero rowashiretako-tyaawo rantayitziri, eempatziitaki. Okimiwitakawo opirota-kaantzira itahaeta, tema eempa-wathata-kaantzi eero akemaero katsiri. <sup>3</sup> Eero ishineta-kaantziro raawakaetyaa, itztakaantyaawo okaatzi rowaetari. Teera okameethatz iroka. Tema aakapaeni akaatzi akemijanta-yiteeri Tajorentsi, ayoteero kyaaripero, rowetsika-yitakaero owanawontsi. Ishineta-haero owayitee-yaawo iroka-paeni, apasoonkiyiteeri. <sup>4</sup> Tema okaatzi rowetsika-yitakiri Tajorentsi, kameetha okantayitaka. Tekatsi oetya apaawaetantyaawori, tema otzimatye apasoonkiteri añaayitziro okaatzi ipayita-kaeri. <sup>5</sup> Tema aririka amatakiro okantziri iñaani Tajorentsi amanako-yiteero okaatzi ipayiteeri, aritaki itajonka-wentakiro.

*Antawaetee-niriri kameetha Jesús Jeepatzii-totaa-rewo*

<sup>6</sup> Rootakirika piyotaan-takiri iroka, pimatanaa-kitziiro pantawaeteeniri kameetha Jesús Jeepatzii-totaa-rewo. Pimonkaata-naatziiro okaatzi pikemijanta-neeri, pimatanaa-kitziiro

kameethari okaatzi riyotahae-takimiri. <sup>7</sup> Pipaka-yiteero kenkitha-rentsi-paeni kaari rooperotasini, rootaki ameta-piinta-shitakari majonto okenkitha-yitziro iroka. Tema otzimatyeepiñaa-shintsi-shireta-neeyaa pimatan-tyaawori pipinkatha-tajorentsinee.\* <sup>8</sup> Tema okameethatzimowitee añaayitziro añaashintsi-waeta koñaatziro awathaki, tema rootaki kameetha-perotasiri añaashintsi-shireta-neeyaa añaantyaawori apinkatha-tajorentsinee. Teera rootaki antantayitawori okantyaa anintaa-waetan-tyaari nimaeka eeniro añaayitzi, añaahaero paata anintaa-waeteeyaa aririka añaahae. <sup>9</sup> Kyaariperori irokañaantsi, otzimatyeepiñaa akemijantee maawoeni. <sup>10</sup> Rootaki añaanta-yitawori añaashintsiyita, ashintsitzi antawae-yitzi, tema oyaako-teeri Tajorentsi jempe itzimi kañaanitatsiri. Kantacha rowawijaako-shireteeri maawoeni atziripaeni, riitakira rowawijaako-shire-yitee ikaate kemijanteerini.

<sup>11</sup> Rootaki piyotaan-tayiteeri iroka, pishintsitan-teero. <sup>12</sup> Tee nokoyi itheenkimawaeteetemi pewankaritzira. Tema otzimatyeepoñaahantero jempe pikantanaapikemijanteera, ari okantyaa roshiya-kotanteetemiri. Otzimatyeepaminakowenterokaatzi piñaawae-yitziri, eejatzi okaatzi pantayiteri. petakotanteeeyaa, pikyaaryoo-tee, pikiteshiretee. <sup>13</sup> Pishintsitaa-piinteeniri piñaana-yiteeniri atziripaeni Jankina-rentsi-perori, pikenkithatapiinteero, piyotaanta-piinteero, roojatzi piñaanta-

---

\* <sup>4:7</sup> majonto = antawo-pero-paeni

kyaawori nareetemi janta. <sup>14</sup> Pikenkishiryaa-kotero ikenkithata-kota-kimiri paerani jewari-paeni, ari okanta itajonka-wentan-takimiri roteya-patzii-totan-tayitzimiro rako. Kyaaryoowa papaatziro-kari itajonka-wenteemi Tajorentsi pimatan-taawori iroka. <sup>15</sup> Piñaashintsi-wentaneeyaawo, okantyaa iñaantee-temiri eekiro piyaata-kaana-kityeero pimatanakiro. <sup>16</sup> Paamaeyaa eeroka jempe pikantanaa, pikenkithashiryahaa-kotyaawo kameetha okaate piyotaan-tayiteeri, okaate pantayiteri eejatzi. Aririka pimatakiro pikyaaryoo-wenteero, aritaki piñeero pawijakoshiretee, eejatzi ikimita-yitee-yaari ikaatzi piyotaa-piintakiri.

## 5

### *Anteeniriri paashini-paeni*

<sup>1</sup> Tee okameethatzi pikijatha-yiteri antariperopaeni, kameetha piñaana-yiteri. Rootaki kamethatatsini paakameetha-yiteri pikimitakaanteri riirikami pipaapate. Ari pikimiteeri ewankari-paeni, paakameethateri poshiyakaanteri riirikami parentzi. <sup>2</sup> Otzimatyeepaakameetha-yitero antawopero-paeni, pikimitakaantero roorikami piniro eeroka. Ari pikimiteerori ewankawo-paeni, paakameetha-yitero, eero poshiretawo pikosheka-waetyaawo pikimita-kaantero roorikami pitsiro.

<sup>3</sup> Paakameetha-yitero kinankawo jempe otzimi maperotzirori okowityaa-waetzi. <sup>4</sup> Rooma apaani

kinankawo tzimayita-tsiri otomi-paeni, ojari-paeni, riitaki etanakyaawoni raminiro ramitako-yitero, otzimatyeet ipiyatee-yaawo raminako-wentee-ro okimitakirira paerani roori rantaritan-takari rirori. Rootakira inimotziriri Tajorentsi.

<sup>5</sup> Rooma apaani kinankawo jeekawaetashitachari apaniroeni, awentee-yaari roori Tajorentsi, ashi owaero oetziñaarikotyawo amanyaa okowa-koteeri kitejeriki eejatzi tsireniriki. <sup>6</sup> Rooma eerorika ojeekanaki kameetha antayitanakiro okowashiyitanakiri roori kinankawo-paeni, teera ojeeki kameetha, okimiwitaka okamaki-tyeemi.

<sup>7</sup> Pishintsi-tero omatantee-yaawori nokantakiri, ari okantyaa eero otzimanta ikenkithatako-tee-terori. <sup>8</sup> Eeniyitatsi kaari aminironi isheninkapero okaakini okinankawotanakirika. Riitakira ma-perotachani kaari amineeroni riniro aririka okinankawotanaki. Okimiwitakawo ipakana-kityeeromi ikemijantzi. Riitaki maperota-kirori rawijanakiri ikanta kaari kemijanta-tsini.

<sup>9</sup> Iroka kowachari rojankinata-kotee-tantyaawori kinankawo-paeni antawaeteeniri Jeepatzii-totaa-rewo: Antawo-pero-paeni iroka, kinatariri paerani oemi,\* <sup>10</sup> kameetha-shirerira ikema-kotee-tziro, aminako-wentziri atomi-paeni, oemaantzi opankoki, aakameethata-piintakiri kemijantzinkari, oneshironkatapiintziri ashironkaenkari, omata-piinteero okaatzi kameetha-yitatsiri.† <sup>11</sup> Rooma

---

\* <sup>5:9</sup> Antawo-kona = okaate 60 ojarentsite      † <sup>5:10</sup>  
aakameethata-piintakiri      =      okiwa-kitzita-piintakiri;  
kemijantzinkari = kiteshireri

kinankawo kaari antawo-perota-tsini, eero rojankinata-koetziro. Eero okanta-perota antawaeteeniri Jeepatzii-totaa-rewo, tema eeniro okoyi ayi oemi. <sup>12</sup> Tema aririka ahae itsipa oemi, aritaki ikantako-waetee-takiro, tema eero omonkaatziro okaatzi okontawitakari anterimi. <sup>13</sup> Aritaki operata-nakyaawo, okinayite pankotsi-kipaeni, okenkithawaeta-kotan-tayite, akakawaeta-shityaa. <sup>14</sup> Rootaki nokowantari aayitee oemi apaani kinankawo kaari antawoperota-tsini, itzimayitee eentsite, ojeekiita opankoki antawaete. Ari okantyaa eero itzimanta iita kijimawaeteroni. <sup>15</sup> Tema tzimayitatsi matakirori, antawaetashitakawo ikoyiri Kamaari.‡ <sup>16</sup> Kinankawo tzimatsiri oshenkapaeni, riitaki amitako-yiteroni. Rooma kinankawo kaari tzimatsini oshenkapaeni, jeekatsiri apaniroeni tekatsi amita-koteroni, osheki kowityaa-waetzi roori. Rootaki kowaperota-chari ramitakotero itsipa kemijantzinkari-paeni.

<sup>17</sup> Otzimatyeera ipineeteeri jewatakaan-tatsiri ipinkathee-tziri. Riitaki ipaperoteete kenkithata-kaanta-piinta-tsiri, eejatzi ikaatzi yotaanta-piinta-tsiri.§ <sup>18</sup> Tema rootaki ikantakoe-tziri Jankina-rentsi-peroriki:

Aririka pantawaeta-kaeri apaani piratsi, tee okameethatzi itashe-ya-waete.

Iroka ikantzi eejatzi:

Otzimatyeeripineeteeri antawaeta-tsiri.

---

‡ **5:15** Kamaari = Yakatantaniri § **5:17** ipaperoteete = oshiayworapiiteetero ipineetero

**19** Ikaatzi-rika apaani atziri kanta-kotziriri apaani jewari, eero pikemijantziri. Rooma ikaate-rika apite, eerorika ikaate mawa ñaakotakirini rantakiro kaari-perori, ari okameethatzi ikemijanteeteri. **20** Eekiro-rika riyaaatee-tatyee ranteetero kaari-perori, payiri jempe ipiyoteeta pikijathateri, ari okantyaa ithaawan-teetyaari, eero imatantawo rantero itsipa-paeni. **21** Noshintsi-tzimi pantero iroka. Tema aririka pimataneero, eero piñiiro pamaakitante. Eero pikanta-waetzi “Eero nokijathatziri, tema rioperori irika.” Riyotzi Tajorentsi nokantantzimirori. Riyotzitawo eejatzi Jesús Jeepatzii-totaa-rewo, riyotzitaka eejatzi ronampiripaeni Tajorentsi ikaatzi riyoshiitakiri. **22** Tee okameethatzi pathawae-yaawo poteya-patzii-totan-tyaawo pako reewatan-teetyaari. Tema aririka riyotee-takiri rantakiro kaari-perori, ikimiwitakaha eerokami kantakaa-shityaawoni. Tema otzimatyee pikite-shiretee eeroka.

**23** Teera apatziro pirapiintero nijaa, pirtyaawo eepichokiini kachori, ari piñaakiro petsiyata-kote pimantsiya-waewitaha.

**24** Eenitatsira atziri, tekira iñeero riyakowenteeteri rantakiro kaari-perori, ikema-koteetakiri maawoeni. Eenitatsi itsipa eejatzi kaari riyotakoetzi rantziro-rika kaari-perori, apatziro ikemakoeteri paata. **25** Ari okimitari eejatzi, teera romana-kota-piintero atziri rantayitero kameethari. Rooma aririka rantero kaari-perori, ari ikowa-piinta-wityaa romana-kotyaa, roo kanteencha aritaki ikemakoe-takiri.

**6**

<sup>1</sup> Maawoeni omperataa-rewo, otzimathee ipinkathateeri omperatariri. Roo nokantantari, ari okantyaa eero itzimanta paeryaa-shiwaetyaarini Tajorentsi, eero itzimanta kantako-waeteeni ayotaan-tayitzirira.

<sup>2</sup> Omperataa-rewo kemijanta-tsiri, aririka romperatemi itsipa kemijantzinkari, tee okameethatzi pikanta-waete: “Eero pikimitakaanari pomperatani, tema noyemijantzin-karite eeroka.” Tema okowa-perotatyaa rantawaeteniri kameetha irika omperataa-rewo, retakotani royiri, tema kemijantzinkari irikai. Otzimathee piyotaan-teero iroka, pishintsi-tan-teero.

*Kiteshireta-kaanta-tsiri eejatzi inimotaantsi*

<sup>3</sup> Aririka ipoki inashityaawoni ikenkithata-kaante, kaari ikimityaawoni okaatzi iñaaniytakari Awinkatharite Jesús Jeepatzii-totaa-rewo, rinashita-paakyaawo eejatzi ikenkithata-kotero pinkatha-tajorentsitan-tatsiri. <sup>4</sup> Kantakaa-perowaetzinkari irika, tekatsira riyote. Apatziro ikoyi rirori añaanatawakaa-wentyaawo iñaani Tajorentsi. Roo opoñaan-tyaari oñawakaa-waetyaa, akosheka-wakaa-waetyaa, akaweya-wakaa-waetyaa, akanta-kota-wakaa-waetyaa, <sup>5</sup> akijaneentawakaa-perotanakyaa. Rootaki imata-piintakiri kaari-pero-shireri kaari yotakoperoteroni kyaariperori ñaantsi. Ikenkithashiryaaayita raantyaawo koriki ramawenatawo aririka ipinkathatajorentsitanakaha. Tee okameethatzi

paapatziyari eeroka.\* <sup>6</sup> Aritaki okantzimaeta, osheki ipineeteero paata apinkathatzirira Tajorentsi. Roo kanteencha añaantyaawori ipineetee, otzimatyee inimoyitee añiiri okaatzi tzimimo-yiteeri. <sup>7</sup> Tema paerani owakira atzimapaa ki tee amapaaki tzimi-moteeri. Ari okantari eejatzi aririka akamae, okaate tzimi-moteeri eero aaneero. <sup>8</sup> Tema otzimapiintzi-rika oyaari, otzima-piintzi-rika akithaatari, ari okaate tekatsi akoyiri otsipa. <sup>9</sup> Riima ikaate kowayiteroni rashaahantyaa, okaema-shiretzirri ikaariperoshirete. Ikimita-kowaetakari shirika-chari iwarentsiki, aririka rantayita-nakiro ikowakaashiyitari owaariperotan-tatsiri, rootaki peyakaa-shitee-yaarini. <sup>10</sup> Aririka ikowa-piinteetero rashaahanteetyaa, okimiwitakawo roomi oparethatari kaaripero-yitatsiri. Eenitatsi matakirori iñaamayitawo rashaahantyaa, ipakaanakiro ikemijantzi, okimiwitakawo riimi kemaatsita-kaawaeta-chanimi apaniroeni.

*Pikimita-kaantero powayiri-wentee-yaawomi pikemijantane*

<sup>11</sup> Rooma eeroka, rashiteemi Tajorentsi, eero panta-netziro iroka-paeni, pikimita-kaantero pishiya-pithateeromi. Tema roo pikowa-perotziri pitampatzika-shirete, pinkathateeeri Tajorentsi, pikemijanteeri Tajorentsi, petakotantyaa, pamawe-waenite, pamatsinkyaa eejatzi. <sup>12</sup> Eekiro pikemijanta-naatyee, pikimita-kaantero powayiri-wenta-neeyaawomi kameetha-yitatsiri.

---

\* **6:5** Tee okameethatzi paapatziyari eeroka. = otsipayita ñaantsi-paeni

Pikimita-kaantero eejatzi piñaa-shintsi-wentee-yaawomi roojatzi paantakyaawori kanteetaachani añaakahaemini. Rootaki ikaema-shiretee-tantzimiri, ari okanta ikemanteemiri atziri-paeni, pikantzi: "Nokemijantee." <sup>13</sup> Eenitatsi noshintsi-temiri. Tema irika Tajorentsi añaakaa-yitzirori okaatzi tzimayita-tsiri, riyotzi nokantzimiri. Riyotzita eejatzi Awinkatharite Jesús Jeepatzii-totaa-rewo, ñaawaeta-piinta-kirori kyaariperota-tsiri, roojatzi iñaawaeta-paakiri rahaeta-nakiririka ijeekira Poncio Pilato. Iroka okaate noshintsi-temiri: <sup>14</sup> Eero pipiyathatawo nokanta-kaantakimiri. Pikiteshiretee itzimi-kari ñaawaeta-kowaeta-shitemiri. Piyaata-kaero eeroka roojatzi ipiyantee-yaari Awinkatharite Jesús Jeepatzii-totaa-rewo. <sup>15</sup> Tema ari ipiyee rirori aririka ikowakaapakyaaworika Tajorentsi, ajahaa-wentani. Tema apatziro Tajorentsi reewata-kaanteero maawoeni tzimayita-tsiri, apatziro ipinkathari-wentziri ikaatzi pinkathari-wentwitachari, ari reewatziri ikaatzi jewawitachari nimaeka. <sup>16</sup> Riitaki ashitawori kanteetaachari añaamentotsi, ashi rowaero ijeeki jempe oshipakiryaa-perotzi, rootaki kaari rareetanteetari. Tekatsi atziri materoni iñeeri, eero imateeteero eejatzi. Omaperotatyaa ipinkatheetziri. Ashi rowaero ipinkathari-wentantee. Kyaariwé.

<sup>17</sup> Otzimathee piyotaa-yiteeri ikaatzi ashaahanta-chari nimaeka, eero ikantakaaperowaetanta. Eero rawentaa-shiwaetawo rashaahawo, tema eero okijotzi-motziri. Otzimathee rawentaa-yitee-yaari Tajorentsi,

riitaki matzirori ithaamenta-kaantapero-ta.  
 18 Piyotaan-teero ranteeteero kameethari. Ikimita apaani ashaahantzinkari otzimimo-perotziri owaahawo, ari ikimita-neeyaari irika-paeni otzimimo-perotziri rantani, rootaki ikimita-kaanta-neemi roorika rowaahawo. Piyotaan-teero ineshironkae-tante, ikowayite ipashitan-tayiteeyaa. 19 Rootakirika imataneeri, okimiwitakawo rowaan-tyaawomi rashaahawo ikashiya-kaeyaari paata. Ashi rowaero iñeero ijekae kameetha.

*Oweyaanta-paakawori ikantziriri Pablo irika Timoteo*

20 Timoteo, pikyaaryoo-wenteero piyotaan-teero okaatzi ineshironkae-takimi. Eero pimatxitawo eeroka jempe ikenkithata-kotashtieetawo kaari-perori. Eero pimatxitawo eeroka jempe iñaanata-wakantashitawo ikimita-kaanta-witari rooperori iroka riyo-yitziri. 21 Tema eenitatsi mayitakirori, ikinashi-waeyitaka, kimiwitaka itzimpina-wenta-tyeeromi okaate ikemijanteri. Okantashitzimaetya ineshironkaetemi. Kyaariwé.

**Las Escrituras en Ashéninka Ucayali del Sur  
del Perú**  
**The Holy Bible in the South Ucayali Ashéninka language  
of Peru**

**Las Escrituras en Ashéninka Ucayali del Sur del Perú**  
copyright © 2008 Wycliffe Bible Translators, Inc.

Language: Ashéninka Ucayali del Sur (Ashéninka, South Ucayali)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-06-08

---

PDF generated using Haiola and XeLaTeX on 11 Nov 2022 from source files  
dated 9 Oct 2020

db14e188-438b-52a5-9541-56657c3fc3d9